

# Luis Curschellas-Venzin, Sedrun

Ils 10 da decembre 1990 havein nus priu cumiau da nies vischin Luis Curschellas-Venzin. Parents, vischins ed enconuschents han assistiu cun cor grev al survetsch dä sepultura ed accumpignau el al santeff da s. Vigeli. Ei va vess da realisar che Luis ha bandunau nus en la vegliadetgna da mo 62 onns. Ils numerus presents ein in segn dalla simpatia ed attaschonza viers il stimauf defunct.


Il «Luis coiffeur», sco biars nummanvan el, ei naschius ils 6 d'avrel 1928 vi Surrein. Cun 2 frars e 3 soras dils geniturs Luis Curschellas e Barla Catrina, naschida Berther, ha el passentau ina emperneivla affonza egl uclau puril. Suenter las scolas primaras e secundaras absolva Luis cun bien success igl emprendissadi da frisunz a Cuera. Duront in onn serenda el a La Chaux-de-Fonds, carteivel per sescolar empau el lungatg franzos. Il svegliau giuven muntagnard tuorna denton puspei anavos en ses carezai cuolms. Sin plaz cadrivi lavura Luis in tschuppel onns sco coiffeur en la fatschenta da siu aug Maurus Berther. Quella acquista el pli tard.

## Famiglia e professiun

Igl onn 1958 meina Luis la giuvna Catrina da Selva agl altar da nozzas. Il Tutpussent regala ad els 8 affons, 3 mattatschs e 5 mattatschas. Ei basegna laver e stenta e mo cul sentiment da solidaritad denter geniturs ed affons prosprescha la cuntentientscha e la legria ella gronda famiglia. Il grond gidava quel che vegneva suenter sco avon onns, quei che sepagina pil futur. Malgrad sia pintga statura ha Luis barhau ed era ughegiau ch'ei fa smarvegl. Dapi 1970 fa sia casa nova sper Via principala ina stupenta cumparsa. El plaunterren secatta la fatschenta da «Sport Cristal» e dasperas in salun da coiffeur. Ensemen cun dus feglis meinan els lur fatschentas per cumpleina satisfacziun dalla clientella. Ils bellezia scazis ord nos cuolms en vitrina lain buca dubitar che Luis e ses feglis seigien capavels e renomai cavacrappa. Il defunct ha apprezziau la natira ed anflau bia satisfacziun sco cavacristallas.

## Cultura e sport

Luis Curschellas ei staus in um sempel e mudest. El steva bugen da cumpignia, saveva tedlar e fageva paleis siu bien meinil il dretg mument. Malgrad sia gronda truscha ei el separticipaus sco commember activ ed era funcziunau sco suprastont en differentas uniuns da cultura e sport. Aschia ha el cantau 27 onns el chor-baselgia. Ils cantadurs han



remunerau lur bien commember d'honor, purtond salids sur fossa culla canzun da cumiau. Plinavon ei el staus coniziant tier la fundaziun dall'Union cristal Tujetsch e segidaus sco actuar da quella duront 6 onns. In resentiu engraziament mereta Luis era per siu engaschi e susteniment pil sport. La cuorsa liunga fuva in sport preferiu da lezzas uras. Insumma fuvan ils Curschellas e Co. respectai curriders ell'entira Surserla. Ella brigada 12 han els cuntonschiu inaga igl emprem ed inaga il secund rang. Duas participaziuns al campiunadi svizzer ein finfatg ina honur.

## Cumiau

Ils davos onns ei il defunct vegnius mudergiaus da pliras malsognas. Empau serestabilius suenter ina operaziun pren el empau pli lev. Per sia dunna Catrina ch'era taccada dapi onns d'in nausch mal dall'olma, ha el giu bien quita e consolau ella en sias grevas uras. Suenter tonta stenta havessen els dus saviu prender uss empau pli lev. Mo il Tutpussent dispona auter. Ils 23 d'uost 1990 deliberescha el nunspitgadamein la Catrina da sia stgiradetgna nunsupportabla e meina ella alla glisch perpetna. Il mariu pren la crusch, mo la peisa vulnerescha siu intern. Senza schar percorscher ha Luis pitiu zun fetg. Treis meins e miez pli tard arriva nunspitgadamein sia ura. Suenter ina greva attacca dil tschurvi miera el ils 7 da decembre 1990 el spital a Glion.

Ussa ha il defunct adempiu siu pensum terrester per famiglia e cumionza. La mort prematura da bab e mumma muntan ina greva crusch per ils ses. Nus admettein ad els nossu sincera condollientscha. Nies Bab regali a Vus curascha e speranza ed a Vos cars geniturs la meritada pagaglia entras la pasch eterna.

Ciril Monn